

# FILIPENSES

## Paulo Kata Inweniby Filipos Donro Modoram

*Xirâ kata wâgâ inwenily Paulo nhangahu odaji iemâmy Deus. Awylygue Deus itaumbryrlâ xirâ Paulo inweniby. Paulo, Jesus Cristo wâgâ aguehoem aguehoymy xirâ kata igonomâ, Romadâ kadeia oday tâtagu ume. Deuslâ myakâwândy iweniehorim, xidadâ Filiposdâ Jesus einwânni modoram. Paulo xirâ kata inwenily myakâwândy dez a doze anu ipygueduo waunroem kuru Filiposram tâtâhobyry sakabygueduo. Pauloram dinheru tugonosemo myakâwândy. Xirâ kata wâgâ dinheru nhuduhomobyry wâgâ koendonroem awylymo adâkeze mâkâ. Jesus Cristo xurâem tawylygue, tuomare tawyly, tywenize myakâwândy Paulo, tâtagu umelâ iwâgâ adâkehobyry wâgâ. Filipos donro modo turuse myakâwândy tuomare lelâ itomoem, tâsenagazedylimo ume, kâmayno amaym tawylymo ume alelâ. Cristo wâgâ iozepa kulâ unâ egatuwâni modo agueho neinwâmpyra itomoem, turuse myakâwândy, âdara Cristo ize ato ara anhedylimo awyly wâgâ lâpylâ warâ.*

### Aguely adaguho

**1** <sup>1</sup>Urâ Paulo xirâ kata âyanmo iweninri, âmaemo Jesus Cristo agonro modoram. Tarâ yagâlâ merâ Timóteo. Cristo Jesus emary xina; ewanulâ xina anhekyly. Âmaemo Filipos donro modoram xirâ kata xina ingonodyly, tynynonroem Deus induakeyby modoram, Cristo Jesus eynynonro modoram, Cristo eynynonro modo iwymâryam, emawyadâni diâcono domodoram lâpylâ warâ.

<sup>2</sup>Âynynâmo Kunwym Deusram, Kywymâry Jesus Cristoram warâ kâenkadyly koendâ mâzehohomoem, akaladânimo peba mitomoem warâ.

### Paulo Deus agâ aguehobyry Filipos donro modo eynynâ

<sup>3</sup>Inanâgueduomo watay, aunlolâ Deus agâ auguely: “Pabai,

koendonro lelâlâ âmâ Filiposdâ âynynonro modo agâ, âinwântoem amânhenehon-homobyry wâgâ” tâkeze winase. <sup>4</sup>Deus agâ âynynâmo augueday, tuomare kehoem inanry auguely. <sup>5</sup>Tuomare urâ, unâ koendonro Jesus wâgâ kêngatuday iemawydâdomobyry wâgâ; saguhoem kuru Jesus mâinwântaymo, won-hondâdâmo, unâ iwâkuru Jesus wâgâ kêngatuday, won-hondâzezêlâ âmaemo-ro warâ. <sup>6</sup>Jesus mâinwântuomo, Deus iweloem âetondâmo. Ize ato ara lelâ amitomoem aiesezêlâ mâkâ. Koendâ tutuze urâ, tiangüppy, ewanikeze Deus awyly. Aituo ise Cristo Jesus âetonduo, mâkâ âizemo ato ara kehoem ise âmaemo. <sup>7</sup>Aunlolâ inanry inanâguelymo. Toenzepa kâinwynegyly mawylmogues. Koendâ lelâlâ Deus yagâ awyly, xurâem aguehoem ayenehon-homobyry wâgâ.

Xirá unâ egatuly wâgâ won-hondâdâ mawylmogue. Saguhoem pymâdo enadoram kâjigâseoday, unâ koendonro Jesus wâgâ agueim wâgâ eyanmo augueday won-hondâdâmo. Iwerâ tarâ ietadâdomobry oday ekâjibyem wawly ume won-hondâdâlâ âmaemo. <sup>8</sup>Deus tutuze, âwynedâmo wawly. Âwynedâmo urâ, Cristo Jesus âwynedomo ara lâpylâ. Âkealâ xirá auguely; uguewâdyly kulâ mâkeba.

<sup>9</sup>Kâenkadyly inanry Deusram, imâem lelâlâ âjigue mâpynedomoem. Deus koendâ kehoem mâuntuzezedylimo lakuru ize wato; âdy koendonro, âdy koendâpaom warâ awyly mâuntuzezedylimo ize wato. <sup>10</sup>Arâ ise koendâ mawylimo, koendonro lelâ amânhekylymo warâ. Aituo ise xypyry etay Cristo odopâduo, âdy inakaigue tâwentâzeba mawylimo. Tywykeba ise âmaemo mâkâ xurâem. <sup>11</sup>Koendonro aiesezelâ ise âmaemo, Jesus Cristo lelâ anhekyly. Koendonro amânhekylymo wâgâ toenzepa ise Deus âzehoguely, aguezemo eon-honru wâgâ, koendonroem awyly wâgâ warâ.

### Cristo xunâry egatuly

<sup>12</sup>Cristo eynynâ ypemugudo, tâwâlâ lelâlâ wâne kâsenagazedylily, mâuntudyzemo olâ urâ, unâ iwâkuru Jesus wâgâ tâzegatuozelâ awyly; toenzepa kurâ domodoram âjidaholy awyly warâ. <sup>13</sup>Cristo emary wawlygue ietagu. Idânârâ sodadu romano domodo, iwymâry kuru ety eni modo tutuzemo, kurâdo taunlo modo tutuzemo lâpylâ warâ. <sup>14</sup>Taunlo modo Cristo eynynâ ypemugudo, Kywymâry Jesus tâinwânsezemolâ, Deus itaumbry egatuze tyanepamo warâ. Ietagu umelâ, kâjityembyra wawly tiuntuduomo, Jesus anhedysemo ato adyesemo, tâsenagazedylily umelâ nâjityembyramo.

<sup>15-17</sup>Tâlâ Jesus wâgâ agueim ewy yizepaom modo. Koendâ tawlygue inkâba Jesus wâgâ aguelymo, akaemolâ tâdyren-honly-ro warâ ize tawlymogue, tydani modoram koendâ tâzeyywaoly-ro warâ ize tawlymogue kulâ warâ. Tâdâtuagadyly, tâdâtuebadyly warâ kulâ adienyde atomo. Warâ tuoday aguelymo: “Toenzepa ise Paulo âsewânily, kurâdo aguykely indadyly kely tindatuo” kelymo. Augueondyly, inakanhe adâkelygue kulâ Jesus wâgâ aguelymo.

Tâlâ pylâ Jesus wâgâ koendâ unâ egatuim modo. Iwâgâ aguelymo, mâkâ tinwynedylygue, ywynedylymogue warâ. Tutuzemolâ, Deus ietadânehonly tarâ, pymâdoam Jesus xunâry kâengatuhoem awyly.

<sup>18</sup>Akaemo tynrentoem kulâ, tâpywadoem kulâ Cristo wâgâ aguewâni modo wâgâ, kâsewânily witaymba urâ. Womaru lakuru, agui Jesus wâgâ aguely idataynrim modo idylygue. Cristo tinwynedylymogue iwâgâ aguelymo watay, tuomare lelâ urâ. Womazeâni kuru olâ Cristo xunâry egatuly. <sup>19</sup>Tutuze urâ, idânârâ yagâ aitaynrim modo urâem koendâ itoenlâ aidyly awyly. Deusram urâem tâkazema âmaemo, Jesus Cristo ingonotyby Deus Ispiritury yagâlâ wawlygue warâ. <sup>20</sup>Ize wato kuru olâ Jesus Cristo kâinwypazenehomba wawly. Awlygue, iwerâ, tyanepa Jesus wâgâ auguedyse wawly, tâwâlâ lelâlâ wâne ise âdylâ yagâ aidyly. Yâzemo keanra, tarâ ietagodâ ietyzemo keanra warâ. Tâwâlâ ise wodo âdalâ âieholly, Cristo wâgâ koendâ aguehonly olâ ize wato.

<sup>21</sup>Yiguepa wawly ara, won-honru Cristo nhuduypygue idânârâ adyese lelâ urâ. Yiguely-ro watay, emakeze urâ koendonro urâem nhekanâdyby. <sup>22</sup>Yâpamo-ro watay, Cristo xunâry

egatuin-enlâ ise urâ. Âdy urâem koendonro awyly kâuntuba urâ, Cristo wâgâ auguezesedyly atay, yiguely atay warâ eagâ witoem. <sup>23</sup>Azakâlâ urâem koendâ awyly. Toenzepa yiguedyse wawyly, toenzepa mawânâ Cristo agâ widyse wawyly. Koendâ lelâ ise awârâ urâem. <sup>24</sup>Âmaemoem koendâ awyly yiguelâ, Cristo wâgâ inomedâzedomoem. <sup>25</sup>Tutuzelâ urâ, inepa yâpamo awyly; agâmolâ ise urâ. Agâmo itonze lelâ urâ, Cristo imâem mâinwântomoem inomedâzemo urâ, mâinwântuomomomazehomoem. <sup>26</sup>Cristo Jesus wâgâ inomedâzemo agâmo witondyly-ro watay, toenzepa ise omarumo. “Paulo agâ koendâ mawyly meneho” tâkeze ise Deus mâynrendylymo.

#### Kon-honru, tyanepa kehoem

<sup>27</sup>Yagâ aini wâgâ tâtynanâzeba itaungâ. Cristo einwânni modo aito ara lelâ amidylymo mawânâ koendonro kuru. Âyanmo idâze, udâpa warâ watay, tynynro modo anhekylyem Cristo aguehobyry adyesemo myguehonlymo ise kâindadyse wato. Xutuze lâpylâ urâ, ton-honre Cristo xunâry mâengatuhoem on-hoam itybyem mawylymo, iozepa kulâ unâ egatuwâni modo ton-honre kehoem mâunrutomoem lâpylâ warâ. <sup>28</sup>Cristo eynynâbaom modo kâdytadaundâ; tyanepa itaungâ. Ton-honre mawylymo tientuo, xutuzemo mawânâ ton-honremba tawyly, Deuslâ imakerinmo awylygue. <sup>29</sup>Koendonroem tawyly enehonwâm Deus âyanmo, Cristo, mâinwântomoem, emaryem mitomoem mâjiduakeoduomo warâ. Tutuzelâ akâwâm Cristo mâinwâmpygueduomo, xurâ keba modoram tânagazezeinhe mawylymo. Mâkâ nhutuybylâ awârâ. <sup>30</sup>Cristo eynynâbaom modo inagazedâmo; tâzenagazeoze lâpylâ urâ. Adaimpâni

tozohoinze tamezeba tâitoem myara lâpylâ kozohoinzededyly, Cristo xunâry kâengatuzezedoem. Filiposdâ wawyly ume, tâdâsenagazededyly semaenzezedâ, Cristo wâgâ auguely kâinmopalâ. Iwerâ tydase âmaemo, iwâgâ aguezeselâ wawyly, kâzenagazeoly egary umelâ.

#### Cristolâ uguondoem ini, onro anaxi tâetoem

**2** <sup>1</sup>Cristo agâ âmaemo iwerâ. Awylygue Jesus mâinwyndylymo, agonromo agâ mâpynedylymo warâ. Deus Ispirytyrbe âmaemo; mâkâ mawânkâ nhenimo. Kurâ domodo xurâem koendonro aiedyly mâinmopalâ âmaemo. Tokalâ âmaemo ewy âsenagazededyly-ro watay, agonromo tytyenze âmaemo. <sup>2</sup>Arâ watay, imâem agâmo tuomare witoem, agonromo agâ koendâ lelâ âzetaungâ. Ataen-homo agâ âpyndaungâ. Âzekiba ize matomo nidâ; merâ mâenmawadâgyulymo, mâkâ mâenmawadâbyramo waypa. <sup>3</sup>Âmaemoem lelâ amidylymo tâiseba itaungâ. Agonromo takaze mâdyren-hondyzemo waypa itaungâ. Tynrenseinhe lâpylâ agonromo etaungâ. Pymâem inkâba âduwâdaungâ; tâzetary ara kulâ itaungâ. <sup>4</sup>Âmaemoem lelâ koendâ ize mawylymo waypa itaungâ, eagonro modo xurâem lâpylâ ize itaungâ.

<sup>5</sup>Cristo tyangahu oday xunâgo ara lâpylâ angahumo oday âunâgumo nidâ. Turâem kulelâ aidyly nipyra mawânkâ myakâwâm.

<sup>6</sup>Onro âtugudyly iraynâlâ  
myakâwândy Cristo tâlâ  
awyly.

Âzekiba Tunwym Deus agâ  
awyly.

Arâlâ olâ, tarâ onro anaym  
tawyly ume,

Deus xyrento ara tynrendyse  
nipyra awyly.

- <sup>7</sup> Mâkâlâ iduakeim  
 nâdyren-homba tâitoem,  
 tunwym Deus enado tynrento  
 ara.  
 Idânârâ tâlâ tato modo inmoly,  
 kurâem tâitoem.  
 Pymâ tutuzeim lelâlâ wâne  
 mâkâ,  
 tâzetary ara kulâ olâ  
 aguehoymbyem onro  
 anaxi âewyly.
- <sup>8</sup> Âdaunloenlâ Tunwym Deus  
 aguehobyry nakadaymba,  
 ize ato ara lelâ idânârâ  
 anhesezedyly.  
 Kâtaybyay myakâwâm mâkâ  
 iguely kruz wâgâ,  
 Deusdâpa kipyra kitoem.  
 Arâ myakâwâm Jesus âwâlâ  
 âewyly kâmakeze.
- <sup>9</sup> Jesus igueduo,  
 kurâem tyetonze lelâ  
 myakâwâm Deus,  
 tâzaxilâ odopâdoem.  
 Saguoem xyrentobyry takaze  
 kehoem xyrentoem  
 anhenhonly;  
 idânârâ kurâdo xyrento takaze  
 mâkâ xyrendyly iwerâ.  
 Jesus ezedy xyrentoem  
 aienehonwânmy  
 nhunwym,  
 idânârâ pymâ enday  
 tynrenseinhe kuru itoem,  
 âdaunlolâ kurâ ezedy takaze  
 kehoem.
- <sup>10</sup> Arâ Deus anhedily, idânârâ  
 tynreinseim modo takaze  
 Jesus xyrendyly awyly  
 xutuoem.  
 Idânârâ kaynonro modo Jesus  
 enado âzeguhoam isemo  
 tynrentoem,  
 anju domodo, einwânny  
 iguewâtyby modo alelâ.

- Idânârâ kurâdo onro anano  
 modo Jesus enado  
 âzeguhoam isemo,  
 tynrentoem.  
 Idânârâ onro iano modo enado  
 âzeguhoam isemo lâpylâ,  
 tynrentoem,  
 kadopâ modo, Jesus  
 eynynâbaom iguewâtyby  
 modo alelâ.
- <sup>11</sup> Enado ise aguelymo:  
 “Jesus Cristo, idânârâ iwymâry  
 âmâ.  
 Amânhetbyby wâgâ, idânârâ  
 adâkezemo Kunwym  
 Deus eon-honru, ehogu  
 wâgâ warâ”  
 kelymo ise âzeguhoam  
 itybyem Jesus enado.

#### Deusram tâdâtâho enehonri kurâ

<sup>12</sup> Yataen-hodo kâinwynegyly modo,  
 atârâ agâmo wawyly ume, inomedâ-  
 domo ara amipyra waypa akâwâm  
 âmaemo. Iwerâ agâmopa wawyly ume,  
 inomedâdomobyry aiedyly kâjimowâ-  
 daundâ. Idânârâ xurâem koendâ lelâ  
 amânhetomoem âzeon-hondâdaungâ.  
 Deus xyrentaungâ; aguehobyry  
 mankadylimo xytadaungâ warâ.  
<sup>13</sup> Deuslâ ize tato aguiendyse kitoem  
 aienehoim. Mâkâlâ kon-honru xuduim,  
 ize ato ara lelâ aguitoem, kyangahu  
 oday kunâry itoem warâ.

<sup>14</sup> Âdylâ amânhetomoem amygue-  
 honlymo watay, tâmireba, tylahureba  
 warâ aietaungâ, <sup>15</sup> Deus eynynâbaom  
 modo aitomo araba amitomoem.  
 Deus aguehobyry takazemo, aiedyse  
 ato aniempyramo warâ. Âyanmo olâ  
 auguely, koendâ itaungâ, idânârâ Deus  
 xurâem mawylymo nhutuhomoem.  
 Aguehobyry kadakadaundâ. Koendâ  
 itaungâ, âdy inakaigue tâwentâzeba  
 mitomoem. Deus xutudânry modo

duay kehoem âmaemo; awylygue ximukâ tohoreim kau wogonro tâdâtâho enehorim ara itaungâ, âdara eyam tadaindyly mânehon-homoem, uguely. <sup>16</sup>Jesus wâgâ eyanmo agueze âmaemo, âdara tâdâsemaguely awyly nhutuhomoem. Won-honru nhuduho-byry ara kâsewani âyanmo Jesus wâgâ auguehoem, tâgaseim tâzeon-hoinze waunroem taintoem myara unâ Jesus wâgâ âyanmo kâengatuhoem. Cristo odopâduo, tuomare ise eyam auguely: “Jesus, târâ Filiposdâ âmâem agânhytyby koendâ lelâ âzeholy. Anra asaemo, âwâgâ kâengatuday, âinwânni modo” uguely.

<sup>17</sup>Âdalâ ise unu tyapâze, yiguely, vinhu ânguydo imeom xyâypy onwa iapâdyly Deusram egamehoem myara. Jesus mâinwântomobyry wâgâ âzenagazeoze lâpylâ âmaemo. Tuomare ise urâ, Jesus wâgâ âyanmo kâengatuhobyry wâgâ, iomazeze lâpylâ âmaemo mâinwântomobyry wâgâ warâ. <sup>18</sup>Kâdyoly-ro watay, tâjityenzeba itaungâ. Ohomaendaungâ yagâ, uguely.

#### Timóteo, Epafrodito warâ

<sup>19</sup>Pymâ Jesus ize-ro watay, iweâpa nitaymba ise Timóteo âyanmo kâingonodyly, âdara mawylymo kâuntuhoem, igarymo kâindatuo womazehoem. <sup>20</sup>Timóteo âyanmo igonose urâ, merâlâ mawânkâ, koendâ mawysedonro, âwynenimo warâ, yara lâpylâ. Merâ emyenro kuru omazeânimo, on-hondânimo kâingonokyly lâpeba. <sup>21</sup>Eagonro modo turâenlâ mawânkâ koendâ awylymo, Jesus Cristo ewanu wâgâ nâtynanâdaymbamo. <sup>22</sup>Timóteo olâ emyenromo keba. Koendâ tâsewanize Jesus Cristo emaryem. Yagâ tawyly ume, unâ koendonro Jesus wâgâ tâgatuze mawânkâ ani. Iamudo tunwym nhemawyadâdyly

myara merâ yagâ ewanu. <sup>23</sup>Kâdyoly atay, ietaguelymo atay warâ kâuntuo ise Timóteo âyanmo kâingonodyly, âdara yedylymo awyly mâuntuhoem. <sup>24</sup>Pymâ Jesus kâzetagueoem anhedlyly tâinwânse olâ urâ âyanmo. Arâ-ro watay, urâlâ ise awyarâ idâim.

<sup>25</sup>Epafrodito igonose lâpylâ urâ. Âmaemoma keankâ yam igononi, kâpyneândyly ume. Cristo eynynâ ype-mugu kâinwynegyuly merâ. Sodadu âzekiba âsewanily ara, lâpylâ xina âsewanily merâ agâ, Jesus Cristo wâgâ unâ iwâkuru egatuze. <sup>26</sup>Toenzepa idânârâ nhetondyzemo awyly; toenzepa âseguâdâdyly, newâmadâ kely mâindatomobyry wâgâ. <sup>27</sup>Tâwâne lelâlâ keankâ, iguezeseaji kehoem. Deus olâ nityendâ. Awylygue olâ keankâ kua idyly. Ytyendâ lâpylâ Deus. Epafrodito iguely-ro watay, toenzepa tâise kâjityendyly.

<sup>28</sup>Awylygue ise âyanmo kâingonodyly, mâentondomoem, kua itybyem awyly mâentuomo, omazehomoem. Arâ ise kâjityembyra wawyly, iwâgâ madahuliba mawylymogue. <sup>29</sup>Tuomare mâendaenkudzemo wawyly, âukonomo mâendaenkuhomo aralâ; Cristo eynynâ kypemugulâ mawânkâ. Cristo emary modo mâynrentomo ara lâpylâ xyrentaungâ. <sup>30</sup>Tywâgâ nâtynanâdaymba keankâ merâ; ton-honre kehoem keankâ âsewanily. Newâmadâ, iguezeseaji nidâ warâ, Cristo xurâem tâwanu ume. Wondâ olâ merâ, arâ lâpylâ tâise tarâlâ âmaemo-ro watay wondylymo.

#### Jesus kiei wândylygue kydâzemaleoly, koendonro aguiendylygue inkâba

**3** <sup>1</sup>Cristo eynynâ ypemugudo, xirâ pape kâympygueândyly iraynâ, warâ uguedyse urâ âyanmo. Tuomare itaungâ, Pymâ Jesus xurâem mawylymogue! Ârudâmo lelâlâ

wâne; augueondyse olâ urâ. Iwâgâ todohomaendily mâinmopa âmaemo. Einwândily mâinmopa âmaemo warâ watay, on-hondâzemo mawânâra auguehobyry. <sup>2</sup>“Judeu domodo ezewenry ara adatâwâdaungâ, Deus xurâem mawylymo xutuhoem” kewâni modo agâ tâmaynelâ itaungâ; iozepa kulâ aguehomo kâjidataundâ. Awâkâ arâ agueim modoram “Kaxoro tyewiâsem” tâkeze urâ, kâmayno awylymogue. <sup>3</sup>Kurâ Jesus einwânni modo, Deus xurâ lelâlâ kurâ, judeu domodo ezewenry ara kydadatâoly, kydadatâoba alelâ. Deus Ispiritury kuodanolâ mawânkâ xurâem kydawily xutuhô, Cristo Jesus xurâem kydawilygue Deus kien-hoguedoem aienehoim warâ. Tutuzelâ kurâ, judeu domodo ezewenry ara kydadatâoly, kydadatâoba warâ kydawily keba kâmakeim awily, âdy aguienkyly lâpeba âwâlâ kydâsemaguehoem.

<sup>4</sup>Aguienkyly modo wâgâlâ kydâsemagueuly-ro watay, âsemagueybyem tâise urâ koendonro modo agânhetaymby modo wâgâ. Aguienkyly modo wâgâpa olâ kydâsemagueuly. <sup>5</sup>Israelita lelâlâ urâ, judeu domodo idamu Benjamim iweompyry ewylâ. Yazepygueduo, sete emedyly idily wâgâ myakâwâm yatâlymo, xina ezewenry ara, idânâra iamimeom judeu satâho ara. Âkelo iunu lâpeba urâ, awilygue hebreu lelâlâ urâ. Moisés xina ezewenryem inweniby ara kâinane awisezedyly, fariseu domodo ewy wawilygue. <sup>6</sup>Saguhoem, Deus ize ato agânhekyly waunlo ara akâwâm ienanaji, Cristo einwânni modo kâenagazeday. Xina ezewenry agueho ara adâise winase. Awilygue kâinane uguondo koendonro ara lelâ kâdutuoly.

<sup>7</sup>Idânâra âdara watobyry modo, agânhetyby warâ, iwerâ âdyem nitaymba urâem Cristo anhekyly modo

wâgâ. Saguhoem urâem ize watobyry, âdyem nitaymba iwerâ. <sup>8</sup>Iwerâ Cristo lelâ kâinwânkily, Deus xurâem, koendâ witoem. Cristo kâinwândily iraynâ Deus iomazeânze uguewâtay, idânâra agânhetaymby modo kâendily iwerâ saxium tamuizeim ara kulâ. Iwerâ urâem Kywymâry Cristo Jesus xurâem tâjidyly, iwâgâ koendâ xutuly warâ koendonro kuru, saguhoem agânhetaymby modo takaze kehoem. <sup>9</sup>Iwerâ ize wato tokaleom ara lelâ Cristo agâ wawily, Deus xurâem tâwentâzeba witoem, judeu domodo ezewenry iweniby kâinwândilyguepa olâ, Cristo kâinwândilygue. Agânhekyly wâgâ inkâba Deus xurâem tâwentâzeba wawily. Mâkâ xurâem tâwentâzeba wawily Cristo kâinwândilygue.

<sup>10</sup>Iwerâ ize wato, Cristo koendâ kâuntuzezedily. Mâkâ igueypyem, kurâem itondyby eon-honrugue awidyse wawily. Deus ize atolâ myakâwâm anhekyly, tâsenagazedily umelâ. Arâ lâpylâ ize wawily-ro warâ. Turâem koendonro modo inmoly, kruz wâgâ tâiguehoem, myara lâpylâ urâem koendonro modo kâinmodyze wawily, Deus ize ato lelâ agânhetoem. <sup>11</sup>Arâ ise Deus, iguewâtyby modo kurâem nhetondily ume, kurâem witondily kâenuendily.

#### **Deus aguiendyse ato lelâ aguienkyly**

<sup>12</sup>“Deus yize ato ara lelâ urâ iwerâ” uguely mâkeba; “Jesus aitobyry ara lelâ aini urâ” uguely keba warâ. Awidyly olâ ize wato. Tâgaseim taintoam taintoem âzeon-hondâdily nepagubyra tâitoem myara lâpylâ kozohondâdily aunloenlâ kâinwânsezedoem, eydâ atoam udâly ara. Awârâ myakâwâm Cristo Jesus ize ato, turâem ygâseduo. <sup>13</sup>Cristo eynynâ ypemugudo, Deus ize

ato ara kehoem inkâba urâ, ugueanselâ âyanmo. Tâgaseim âgânâyam MYK nitaymba. Waunroem lelâ nhedyly, taintodâ lelâ. Arâ lâpylâ aitaymby modo wâgâ kâseguâdâbyra wawyly, enanâ-nehoimbyryem wawylygue. Wayam waunroem aini modo agânhetoem lelâ iwerâ kozohondâdyly; Deus agânhe-dyse ato aiese lelâ iwerâ kozohondâdyly. <sup>14</sup>Tâgaseim tâgaky tympygueândoam taintoem toenzepa âzeon-hondâdyly, myara lâpylâ awisezedyly, idânârâ Deus ize ato ara lelâ witoem. Kozohoinly, tâgaseim waunroem saintyby tâpywado nhemakeho ara, urâem koendonro Deus nhuduly kâenmakehoem. Jesus Cristo wâgâ kâsemaguehoem ygâsedâ mawânkâ Deus aunloenlâ eagâ witoem.

<sup>15</sup>Idânârâ kurâ Jesus Cristo ton-honre einwânni modo, ize ato koendâ xutuwanî modo, Deus kyize ato ara lelâ aguissezene. Âduaymo awârâ wâgâ âkeloem tunâgueimbe-ro watay, Deus eyanmo koendâ xutuen-honze lelâ. <sup>16</sup>Awylygue Deus “Aietaungâ” kehobyry lelâ aguyjiene, saguhoem aguehobyry aralâ.

<sup>17</sup>Cristo eynynâ ypemugudo, urâ, yataen-hodo warâ agâmo xina atay, Deus ize ato ara lelâ ani xina aidyly, xina aitobyry ara amitomoem. Xina aitobyry ara aitaynrim modo enua-gaendaungâ; aitomo ara aitaungâ lâpylâ warâ. <sup>18</sup>Tâlâ toenzepa Deus ize ato ara aitânry modo. Toenzepa âyanmo adâkezelâ urâ xirâ wâgâ, iwerâ augueondyly. Toenzepa olâ ytyrnu, wogunru warâ, kâinweniday. Inakanhe adâidylymogue, Cristo kruz wâgâ iguehobyry âwankuem nhedylymo awylygue. <sup>19</sup>Tâmakezeba ise akaemo. Aunloenlâ Deus agâpa ietybyem, âji tâdâsenagazedoam ise âjigonoholyo. Ize tatomo inakai kulâ anhedylymogue. Tâzehoguezemo

inakanhe adâidylymogue, nâpybaze-byramo lâgâlâ warâ. Deus aiedyseba modo kulâ nhangahumo odano.

<sup>20</sup>Aunlo keba olâ kurâ, Cristo eynynâ ypemugudo. Tarâ wâne kurâ iwerâ; kâjidy kuru olâ târâ kau oday Deus eydâ atodâ. Târâpa ise Kywymâry Jesus Cristo âewyly; toenzepa odopâdyly kin-wânwândyly-ro warâ. <sup>21</sup>Jesus odopâduo, kodo xugukewâze, ton-honreingue kehoem eara kitoem; ewâmani keba, igueim keba, iwânzeim keba warâ mâkâ sodo iwerâ. Jesus pymâ kuru; ton-honru idânârâ xirâ anano modo tiuntulygue ise mâkâ kugukely.

#### Tâdâturudo xypyry

**4** <sup>1</sup>Kywymâry Jesus einwânseze-daungâ lelâ, Cristo eynynâ ypemugudo. Toenzepa kâinwynegyuly âmaemo. Awylygue nhedyse wawyly. Toenzepa kadawily, womazeânehondâ mawylymogue.

<sup>2</sup>Warâ auguely Evódia, Síntique warâam. Tutuze urâ, mâewiâmunedylymo. Awylygue koendâ âzetaungâ, uguely. Kywymâry Jesus eynynâ âjipemugu âmaemo. <sup>3</sup>Âmâ koendâ Cristo ewanuem yagâ tâwaneimbyryam, auguely. Xurukâ akaemo azagâ pekodo modo, adataen-hoem itondomoem, uguely. Awâtârâ Filiposdâ wawyly ume, yagâ, Clemente agâ, yataen-ho modo agâ warâ nâsewanimo mawânkâ, unâ koendonro Jesus Cristo wâgâ egatulyem, idânârâ anakâ idatoem. Idânârâ yataen-hodo yagâ âsewaniby modo ezedy iwenibyem pape wâgâ: Aunloenlâ Deus Agâ Ini Modo Ezedy sawo keho wâgâ.

<sup>4</sup>Ohomaenzezedaungâ, Kywymâry Jesus xurâem mawylymogue! Tuomare itaungâ, uguely-ro warâ.

<sup>5</sup>Idânârâ agâ koendâ itaungâ, agâmo koendonro agâ, koendâpaom agâ alelâ;

inepa mawânkâ ise Kywymâry Jesus odopâdyly. <sup>6</sup>Âdy wâgâ kulâ tâseguâdâzeba itaungâ. Âdara mawlymo umelâ, Deus agâ aguewâtaungâ. Deusram eka-daungâ ipa matomo. Mâenkadybymo mâenmakeduomo, “Koendonro âmâ” kewâtaungâ. <sup>7</sup>Arâ eagâ amygeduomo, tâkuâgueba, madahuliba warâ âesemo Deus, âdara anhedyly awyly mâuntuba mawlymo umelâ. Mâkâlâ mawânkâ angahumo oday âdalâ kulâ âunârymo ienehodânry, Cristo Jesus xurâ mawlymogue.

<sup>8</sup>Xirâ kata kâenwanikeday, warâ uguedyse urâ âyanmo, Cristo eynynâ ypemugudo. Madahulilymo-ro watay, koendonro lelâ angahumo odaji âunârymo ietaungâ. Koendâ aguehoim wâgâ lelâ, iozeno wâgâ lelâ, âwankuem tyesenry wâgâ lelâ, tâwentâguezenry wâgâ lelâ, kuomazeâni wâgâ lelâ, kywypazenehondânry wâgâ lelâ warâ âpaunzedaungâ. <sup>9</sup>Agâmo wawyly ume, âyanmo senen-ho, inomedâdâmo warâ, âdara Deus ize ato aiedyly wâgâ. Kâenehoymby ara, inomedâdomobyry ara warâ lelâ aiesevedaungâ. Agâmolâ ise Deus. Ikuâdânimo peba âenehonzemo, koendonro aituo, inakai aituo alelâ.

**Paulo turâem koendâ aityby modo wâgâ aguehobyry**

<sup>10</sup>Kywymâry Jesus agâ wawylygue, toenzepa womaru, dinheru mâingonotybymo wâgâ. Iweâpalâ iemawyadâdyze mawlymo, tutuze urâ. Aunlolâ iemawyadâdyze mawlymo; âdara dinheru mâingonotomo peba olâ ani. <sup>11</sup>Âdy peba wawyly ume xirâ dinheru mâingonotomobyry wâgâ kulâ inkâba auguely. Tâlâ watoguelâ kohomaendyly xutuimbyryenma urâ. <sup>12</sup>Mârâ etay âdype, mârâ etay âdy peba warâlâ ani urâ. Awylygue typynigue, typynigueba warâ wawylygue,

kâseguâdâbyra urâ. Âdy peba wituo, kadahuliwâbyra urâ. Augueondyly olâ, tâlâ watoguelâ kohomaendyly xutuimbyryem urâ, uguely. <sup>13</sup>Idânârâ emaeze lelâ urâ, yagâlâ mawânkâ Cristo. Won-honru xuduze kâenmaen-hoem.


<sup>14</sup>Koendâ amidâmo, yagâ âdinherurumo mâempajigâduomo, kâsenagazedly ume. <sup>15</sup>Macedônia eynynâba iegaseday, âyanmo unâ koendonro Jesus wâgâ egatuly kanguly lakuru ani, âmaemo kulelâ ani âdy ipa wato xuduim, tutuzelâ âmaemo, aramo ini lâpeba. Âmaemo lelâ keankâ arâ yam dinheru xuduim. Koendâ lelâ Deus agâmo nidâ. <sup>16</sup>Tessalonicadâ wawyly ume, tydinheruguepa wituo, yam tugonose ani âmaemo, tokalelâba ani mâingonodylymo. <sup>17</sup>Dinheru mâingonotondomoemba olâ xirâ auguely. Ize wato kuru Deus ize ato lelâ amânhedlylymo. Arâ ise ipa matomo Deus nhuduly.

<sup>18</sup>Xirâ kâinwenily, Epafrodito agâ mâingonotybymo emakerimbyryem wawyly mâuntuhomoem. Dinheru yam mâingonotybymo, toenzepa lelâlâ keankâ! Idânârâ ipa wato modo sanâdâ, nâsegubydâdâ warâ. Âdydo imeom tyânringueim tyam xuduwâtyby tohogueze Deus, tâmakeze warâ, arâ lâpylâ mâkâ urâem amânhetbymo nhehoguedyly. <sup>19</sup>Ipa wato yam muduwâtaundâmo. Awylygue Kunwym Deus âyanmo xuduze lâpylâ idânârâ ipa matomo. Idânârâ sodo mâkâ, tâwânreim keba warâ. Aunlolâ nhuduly Cristo Jesus eynynonro modoram. <sup>20</sup>Kunwym Deus koendonro awyly wâgâ, eon-honru wâgâ warâ aunlolâ aguykenre. Aguykeba kipyra kine. Âkeâ lelâlâ xirâ.

**Tâdâsedaenguho xypyry**

<sup>21</sup>Idânârâ âmaemo Deus turâem induakeyby modo kâendaenkuly,





(Filipenses 4.10-20)

Cristo Jesus xurâ modo. Cristo eynynâ kypemugudo tarâ yagonro modo idaenkulymo lâpylâ. <sup>22</sup>Idânârâ Deus xurâ taunlo modo lâpylâ idaenkulymo, merâ Romadâ pymâ kuru ety oday tâwanuneim modo olâ idaenkurinmo kuru.

**Kywymâry nhesemo**

<sup>23</sup>Kywymâry Jesus Cristoram koendâ agâmo itoem kâenkadyly. Alâ kulâ xirâ kâinwenily. Alâ. Paulo